

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- उपराज्यपाल मनोज सिन्हा होरें श्रीनगर च इक्क उच्ची सतह आहली बैठक दी प्रधानता कीती, उनें नौगाम पुलिस थाने च दुर्घटनावश होए दे धमाके च जखिमयें दी अस्पताल जाइयें डौल पुच्छीं
- जम्मू-कश्मीर सरकारें नौगाम धमाका पीड़ितें आस्ते सींधी सहायता दा ऐलान कीता। मुख्यमंत्री होरें नुकसान ताई पूरे मुआवजे दा भरोसा दोआया।
- केंद्री मंत्री डॉ. जितेंद्र सिंह होरें कठुआ-उधमपुर-डोडा हल्के च प्रधानमंत्री ग्राम सड़क योजना तैहत कई सड़क परियोजनाएं दा उद्घाटन कीता।
- जम्मू मिडनाइट मैराथन दे त्रीये संस्करण च बड़ी मती गिनतरी च लोकें हिस्सा लैता। खेड्ड मंत्री सतीश शर्मा होरें फिटनेस अभियान पर लौऽ पाई।
- जम्मू नगर निगम नै जम्मू च रिवायती जल स्रोतें दे संरक्षण ते नमें सिरेआ जान दी पैहल रम्भी।

<><><><><><>

LG-Meeting

उपराज्यपाल मनोज सिन्हा होरें कल राजभवन श्रीनगर च पुलिस ते सिविल प्रशासन कन्ने इक उच्ची सतह दी बैठक लाइयें हालात दी समीक्षा कीती।

उनें उजाला सिगनस ते S.M.H.S अस्पतालें दा बी दौरा कीता ते उत्थै दाखल नौगाम पुलस स्टेशन धमाके च घाऽल होए दें दा हालचाल पुच्छेआ। डॉक्टरें एल.जी होरें गी घाऽल मरीजें दी स्थिति बारे जानकारी दिती ते दस्सेआ जे उनेंगी इलाज दी हर मुमकिन ते बेहतर कोला बेहतर सुविधा उपलब्ध कराई जा करदी ऐ। उपराज्यपाल होरें अस्पताल प्रशासन गी निर्देश दिता ते मरीजें दे ईलाज च कोई कोर कसर नेई रौहनी लोड़चदी तां जे ओह सब्बै तौले शा तौले नरोए होई सकन।

<><><><><><>

EX-Gratia

जम्मू-कश्मीर सरकारें नौगाम पुलस थाने च होए दे धमाके च जान मोआने आहलें दे परिवारें गी मुखमंत्री राहत कोष चा 10-10 लक्ख रपे दी सींधी सहायता ते गंभीर तौर पर घाऽलें गी 1-1 लक्ख रपे दी मदाद देने दी घोशणा कीती ऐ। इस घटना च 9 जनें दी मौत होई गई ही ते 32 घाऽल होई गे हे। मुखमंत्री होरें प्रभावित परिवारें कन्नै हमदर्दी प्रगट करदे होई सेहत मंत्री सकीना इतू होरें गी निर्देश दिता ऐ जे घाऽलें गी हर मुमकिन ते बेहतर कोला बेहतर इलाज दी सुविधा उपलब्ध करना यकीनी बनाया जा। तोआई, सेहत मंत्री सकीना इतू होरें अस्पताल दा दौरा लाइयै घा-ऽलें दी डौल पुच्छी ते मगरा मीडिया आहलें कन्नै गल्ल करदे होई आखेआ

तोआई, मुखमंत्री उमर अब्दुल्ला होरें आखेआ जे इस धमाके च नुकसान पुज्जे दे ढांचे दे बदले बनकदा मुआवजा प्रभावितें गी दिता जाहग ते सरकार इस कठन घड़ी च हर प्रभावित कन्नै खड़ोती दी ऐ।

<><><><><><>

Jitender Singh Projects

प्रधानमंत्री हुंदे दफ्तरै च राज्यमंत्री ते कठुआ-उधमपुर-डोडा लोकसभा सीट थमां सांसद डॉ. जितेंद्र सिंह होरें कल अपने हल्के च प्रधानमंत्री ग्राम सड़क योजना तैहत 9 अरब 24 करोड़ 33 लख रपे दी लागत आहिलें सड़क परियोजनां दा नीह पत्थर रक्खेआ ते 86 करोड़ 77 लख रपे दी लागत कन्नै मुकम्मल कीते गेदिएं सड़कं दा वर्चुअल ढंगै नै उद्घाटन कीता। उआं उधमपुर जिले च लोअर सौंथन रोड थमां छन्नी मोड़ तगर जाने आहली ते 7 करोड़ 99 लख रपे दी लागत कन्नै तैयार कीती गेदी सड़कें दा उद्घाटन मंत्री होरें मौके पर कीता। उधमपुर-कठुआ-डोडा लोकसभा हल्के गी जम्मू-कश्मीर च प्रधानमंत्री ग्राम सड़क परियोजनाएं चा 60 प्रतिशत हासल होइयां न ते उधमपुर जिला, ग्रामीण सड़क विकास दे क्षेत्र च भारत दे त्रै अक्वल जिलें च शामिल ऐ। प्रधानमंत्री ग्राम सड़क योजना दा मकसद उनें सभनें ग्राएं तगर सड़कां पुजाना ऐ जित्थै अजें तोड़ी सड़क राबता उपलब्ध नेई ऐ। इस मौके पर डॉ. जितेंद्र सिंह होरें आखेआ...

<><><><><><>

CS-Youth Engagement

मुख्य सचिव अटल डुल्लू होरें समूलचे केंद्र शासित प्रदेश च सांस्कृतिक, शैक्षणिक, उद्यमता सरबन्धी ते समुदायिक गतिविधिं गी बढ़ावा देने दे मकसद कन्नै चलाए जाने आहले "युवा सम्मिलित ते सशक्तिकरण कार्यक्रम गितै जारी तैयारिएं दा जायजा लैता। उच्ची सतह दी इक बैठका च अटल डुल्लू होरें तैयारिएं दे बक्ख-बक्ख पैहलुएं बारै जानकारी हासल कीती। बैठका च बक्ख-बक्ख जिलें दे डिप्टी कमिशनरें ते मैहकमें दे अध्यक्ष बी मौजूद हे।

मुख्य सचिव हों निर्देश देता जे इस कार्यक्रम बारे तफसील ते तफसीली कार्ययोजना 15एं दिनें दे अंदर-अंदर एहदे पोर्टल पर चाढ़ी देता जा। उनें आखेआ जे एहदे च शानदार सांस्कृतिक गतिविधियें दे कन्नोकन्नी युवा सशक्तिकरण कार्यक्रमें, सरकारी स्कीमें दे बारे च जानकारी, जिला सतह पर नेइमा तालमेल बनाने ते इस पोर्टल गी माईगोव कन्नै जाइने गी बी तरजीह दिती जा तां जे पंचैत सतह तगर बी हर गतिविधि दी जियोटैगिंग ते दस्तावेजन होई सक। ै

<><><><><><>

Janjatiya-Gaurav Diwas

जनजातीय गौरव दिवस 2025 गी कल बड़े जोश जज्बे कन्नै मनाने आस्तै जम्मू खिते दे बक्ख-बक्ख जिलें च नेकें कार्यक्रमें दा सरिस्ता कीता गेआ। इस मौके पर सांस्कृतिक कार्यक्रम ते जागरूकता गतिविधियें दा सरिस्ता कीता गेआ। कार्यक्रम च अधिकारियें ते मकामी लीडरें हिस्सा लैता ते लोकें गी जनजातीय परम्पराएं गी बचाने ताई पूरे खिते च एकता ते समाजी सद्भाव गी बदाने दी अपील कीती।

<><><><><><>

Jammu Midnight Marathon

जम्मू-कश्मीर खेड परिषद आसेआ रियल टाइम स्पोर्ट्स दे सहयोग कन्नै आयोजित कीती गेदी जम्मू मिड नाइट मैराथन कल रातीं ते अज्ज बड्डलै जम्मू च कामयाबी कन्नै मुकम्मल होई। इस मैराथन च प्रतिभागियें 2 गेइं च ट्रौड़ लाई जिंदे च बड़ी मती गिनतरी च धावकें सेहत, खेड भावना ते आपसी हिरख-प्रेम आहली भावना दा प्रदर्शन कीता।

इस मौके पर मौजूद खेड्ड मंत्री सतीश शर्मा होरें आखेआ जे सरकार खेड्डें गी बढ़ावा देइयें जम्मू-कश्मीर दे लोकें गी सेहतमंद बनाने लेई बचनबद्ध ऐ। श्री शर्मा होरें आखेआबाईट.....

<><><><><><>

Satish-Khour

खेड्ड मंत्री सतीश शर्मा होरें कल खौड़ विधानसभा हल्के च जारी विकास परियोजनाएं दा मौके पर जाइयें मुआयना कीता। अपने दौरे दरान मंत्री होरें खौड़ ब्लॉक च दतेयाल थमां गुजरैल तोड़ी 2 किलोमीटर सड़क परियोजना दा उद्घाटन कीता। एह्दे अलावा उनें टिब्बी महल्ला अखनूर पलांवाला ते सीताराम मंदर-पंचैत मट्टू सड़कें दे जारी कम्मै दा बी निरीक्षण कीता। उनें निर्देश दिता कि कम्मै च तेजी आहिनयै इनेंगी मित्थे गेदे समें दे अंदर-अंदर तोड़ चाढ़ना यकीनी बनाया जा। इस दरान मकामी लोकें कन्नै गल्ल करदे होई उनें बेहतर सड़क राबते लेई तेजिया कन्नै कम्म करने ते हर कम्मे च जवाबदेही तैह करने दा भरोसा दोआया। उनें आखेआ

<><><><><><>

JMC-Water Bodies

जम्मू नगर निगम नै अपने अधिकार क्षेत्र च औने आहले पानी दे रिवायती जल स्रोतें दे संरक्षण ते पतिये नमें सिरेआ तैयार करियै उनेंगी बेहतर बनाने ताईं इक पहल दी शुरूआत कीती ऐ।

संग्रामपुर दे दुर्गाचक्क इलाके दे वार्ड नंबर 75 च विधायक सुरेंद्र कुमार ते म्युनिसिपल कमिशनर डॉ. देवांश यादव होरें इक ऐतिहासिक तला दे संरक्षण, बेहत रख-रखाव ते मियें गी दूर करने आस्तै कम्में लेई नीह पत्थर रक्खेआ। इस कम्मै लेई 23 लक्ख 36 जहार रुपें दी रकम जारी कीती गई ऐ। इस स्कीमें तैहत तला दी सफाई, आले-दोआले रेलिंग लाना, पैदल टुरने लेई रस्ते दा निर्माण ते सैलतन विकसित करना शामिल ऐ। विधायक होरें मकामी लोकें अगगे अपील करदे होई आखेआ जे ओह साफ-सफाई बनाई रक्खन ते तला दे कम्मै च हिस्सा लैन।

<><><><><><>

Prog Announcement

आकाशवाणी जम्मू दा क्षेत्रीय समाचार एकांश 'राष्ट्री प्रेस दिवस' दे मौके पर अज्ज 25एं मिटनें दी इक विशेष परिचर्चा प्रसारित करने जा'रदा ऐ जेहदा विषे ऐ लोकतंत्र च प्रेस दी भूमिका। अज्ज दपैहरी 12 बजे प्रसारित होने आहले इस बशेश कार्यक्रम च स्हाड़े परौहने होडन जम्मू-कश्मीर दे वरिष्ठ पत्रकार ते डेली तस्कीन अखबार दे एडिटर इन चीफ सोहेल काजमी जेहड़े इस विषे पर अपने माहिराना बचार सांझे करडन। इन्दे कन्नै गल्लबात करडन स्हाड़े न्यूज एंकर जगमोहन शर्मा। एह कार्यक्रम तुस स्हाड़े इस्सै चैनल पर मीडियम वेव 303 मीटर यानि 990 किलोहर्टज ते एफ.एम 100 इशारिया 3 मैगाहर्टज पर सुनी सकदे ओ।

<><><><><><>